

T2260.28/2127.4(3)



CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
OCT 31 1940



崑山人物傳卷之二

朱顯宗

朱顯宗字開生號長谷別號西塘大世祖贈南寧郡右侍

郎十兩是及生蘇州指揮公事何州兩浙運判布滿布

尚中崇善寺有生代我生集善集善生公十四歲母病

欲天壽請其以身代人嘗飲酒事無舉亦由意請亦

有醫術之所受生十四歲時之入壽帝之共後者三人而

其妻亦六歲一往是人如地為居三十九年補授生

三乘殿次人名籍是身八大人印守印守時為



崑山人物傳卷之三

朱顯宗

朱顯宗字闇生號淡菴別號西瑄六世祖贈南吏部右侍郎日南夏夏生蘇州指揮僉事質質生兩浙運判希陽希陽生景秀景秀生鈇鈇生集善集善生公十四歲母病革號天露禱求以身代人皆感動事繼母王亦曲盡誠孝兩弟貧析已所受產十四畝讓之又葬弟之無後者三人而嫁其孤女蓋至性過人如此萬曆三十九年補郡諸生四十年授餼文名藉甚會外王父周侍御玄暉為怨家訐





其所著書觸諱逮下詔獄難起倉卒交游莫救公毅然請  
行身捍患難金錢出納動盈千萬毫髮無所私事雖白而  
侍御死公歸屢試于有司不遇崇禎十年里選十二年授  
丹陽訓導教士有方歲祲概不受贄有族子被仇陷配雲  
陽驛捐俸贖之旋丁繼母艱服闋赴部北都已陷聖安立  
補授衢州西安訓導明年南都復失守敗將逃兵所至蹂  
躪而衢當其衝時西安令奉監國命守衢公攝令者三月  
撫輯兵民勞績甚著又明年授監軍理刑專司轉餉勢已  
不可支矣公在開化北兵至冠帶拜闕待盡被執其帥稔  
公得民招就職不從殺五弁相脅終不動歎為鐵漢者再

械致白下自分必死有故交以百口保公放還開化時衢  
猶未下守將知公不屈還請共事公謝病衢兵復開化強  
公安撫公乞攜家行甫三日衢破乃歸崑山順治八年大  
水邑令欲叩閭籲荒糧戶皆萎腰不前萬口一聲謂莫公  
若而未敢請公慨然云吾以舊朝臣僚復驅車入國門則  
不可今竄身歸里一編氓耳安得但自矜惜坐視億兆為  
溝中瘠乎遂觸夏率眾赴都繪圖籲請併江南十四郡皆  
得折漕十之七民賴更生焉康熙七年卒年七十五

論曰公才高氣雄大義所在赴之惟恐不力雖勢際孤  
危愈精明整暇故所事皆得展布為諸生時嘗投公牒



于祁忠敏彪佳始偕行者甚眾既而漸去及庭謁止公  
一人祁詰之公對云投牒不問人多寡顧其言若何耳  
所言私千萬人亦私所言公一人亦公祁改容加禮焉  
籲荒之役眾皆屬公宜矣公竟任之蓋權不失正者歟

### 何爾晉

何爾晉字康侯號笙喬祖道亨天衢太平訓遷鹽城諭父  
季通其智公少穎敏成童即名噪詞壇顧宮諭天竣羅致  
門下萬曆三十九年補郡諸生十一試棘闈弗售順治二  
年拔貢司訓建平令是邑者三韓年少每事請正于公公  
分別可否無隱胥吏側目已而有匿名帖言令短者胥吏

密譖某生所為令怒遽致諸獄公不悅比草澤嘯聚者與  
是生同姓胥吏又謂生為不軌公語令云生在館坐匿名  
帖猶可生在獄坐不軌此莫須有三字也何以服天下令  
遂申公受賄庇生撫與令至戚主其事公遂挂冠歸里隱  
居教授執經者屢滿戶外舉鄉飲大賓十六年卒年六十  
七弟爾昇字日初號平侯別號巫峰精書法工畫竹嗜圍  
棋喜豪飲劇談大笑一座盡傾萬曆四十六年補諸生遇  
利弊所在輒詣當事指陳當事亦重之順治間薦舉賢良  
貢士陳氏有點僕給主貲為權子母知主不善算匿貲幾  
半主託公代覈僕窺公貧持金請厲聲叱去卒理之僕于



雷震中咀咒或語公若弗聞不三日僕暴殞矣同產姊適  
杜啓隆者疾革抱其兒及金珠一篋託公比啓隆歸悉檢  
還之甥甫數齡朝夕訓誥甚至杖泪俱下既青其衿且為  
力持門戶焉以長子訥貴封文林郎後舉鄉飲大賓手錄  
道德經參同契二帙云禔躬善世道無踰此康熙五年卒  
年七十

論曰廣文爭貧生枉法事敝屣一官使得志于時或為  
宰執或為臺諫所救正者豈少哉惜乎小試而不終也  
聞貢士有故人子其外舅欲寢婚約閨中抵死不肯貢  
士挺身出持清議與角不避嫌怨卒諧伉儷後膺誥贈

此其剛直之性亦何減乃兄乎而今已罕能舉其事者  
矣

### 徐開禧

徐開禧字錫餘號念菴萬曆四十四年補諸生天啓元年  
領鄉薦崇禎元年成進士觀政工部上疏具陳祖母諸氏  
節及父永光母許氏孝乞恩旌表奉俞旨建坊如例謁選  
得廣東潮陽見同年生掣湖廣臨武而抱籤泣者慨然與  
易抵境界險惡難治公鎮之以靜務為休息減徭役飭保  
甲于要塞處立嘉禾堡故粵寇破鄰邑而封內屹然兩舉  
卓異擢翰林編修十四年江南大旱特疏懇停折抵免其



畧云請停者何戶部新派照糧均輸本色練米是也練米之役做遼糧帶運例額運一石責令外帶八升蘇松等四郡共派米八萬餘石察此項充薊保諸鎮額需外實盈餘數萬石本部稍一樽節便可不時接濟況以邊鎮贖餘者為窮民一豁免推之兵工二部天啓年間新加每畝一厘悉與停止在朝廷涓滴之惠即子遺浩蕩之澤矣請折者何光祿寺粳糯米及府部院各衙門糙粳米是也察民運白糧有供用內官酒醋諸庫局皆係上供非可輕議如光祿寺派米半給官俸且多陳因改折一年儘可充用至府部院諸臣積俸所入尚需捐措豈有不卹民隱而爭此餘

糈耶通行南京各項正耗 辦盡允折色是可甦民力也請改抵者何以糝米麥豆搭解漕糧是也臣鄉米價貴至三兩三錢取盈于米勢必誤免近聞江廣糝米漸有至者性硬多實堪資宿飽計給軍需何必盡土米耶向來山東有小麥雜糧搭免之例近江北各被災處准以麥豆抵米雖麥價一兩三四錢較之納米數殊懸絕江南誠依此例所省實多但須一頓完納不得零星找欠又須分別裝載不得夾雜混收是在臨時酌行耳皆報可十六年遷右中允嘗預修會典熟習掌故尤究心漕政利弊勒成一書時蘇松常嘉湖五郡歲運白糧米二十餘萬于京倉例簽富



民起解輒破其家公諮詢老成議改官解法大吏采以入告著為令十七年丁內艱歸即遭國變邑舊有志自萬曆四年止公杜門鉛槧者十載續成廿四卷順治十一年奉起用旨郡縣敦促公力辭不獲治裝北上亟引疾告歸繙閱內典延老僧昆谷對談淨土康熙十三年卒年七十六論曰東海之稱公與吾宗之稱先水部差相似要夫歸然老壽文采愈煥發固亦一時之人瑞矣公未葬無誌銘其從子與岡所述者如此岡誠實長者度無飾詞也

孫元凱

孫元凱字若士少穎悟善屬文萬曆四十四年補諸生崇

禎間與太倉顧夢麟常熟楊彞主持文柄為復社眉目九試棘闈弗售立講舍于東臯集四方學者研窮大全蒙引諸書標經權傳析義釐文所著講義及論定闡牘制舉家奉為金科玉律遐邇僻壤家家有之性高介郡邑大夫非公事不見史忠靖可法開府揚州辟參其軍公著兵事七策曰早定建大計以定征伐曰親誓六師以作士氣曰分兵迭出以殲強寇曰大興屯田以佐軍實曰控據要害以制中原曰堅忍任將以成大功曰專謀兵食以斥具文時馬阮方用事不能從也揚州破忠靖殉節公歸崑後閣臣陳名夏以文體猥雜得公諸選而後定言于朝將官之固



辭窮經服古終其身

論曰公詩宗昌黎古文詞嚴峭則近柳州即所訂筆斷亦有起衰功焉遭逢漂陽足稱知己而堅不就徵乃僕僕秦淮射有司之覆何耶迨漂陽得禍人皆稱公先幾之哲矣

徐開禧

徐開禧字休倩號然齋曾祖汝龍封檢討祖應時父永光公為人沈摯有謀當傳眾議論風生獨徐出片語無不大服遇疑事審幾立決見有身殘處穢者心賤之或面折無隱好讀書掩扉習靜無間寒暑萬曆四十四年補諸生崇

禎十年元學使拔第一甚加器重公益鏃礪學問探索根本灼見理諦非比時流詞端奕奕披鮮振藻而已兄開禧成進士官中允季弟開裕亦領鄉薦而公八試棘闈不遇順治七年將里選竟謝去隱居窮鄉自題其集曰半壑吟大都激楚騷屑之聲也先是母沒偕兄弟治喪畢急營葬地揭債典質二千金既遭兵燹典中物不可問弃產以償遂破家十年卒

論曰楊令永言之濬河擇相視監督者夏駕屬諸朱節孝大石浦屬諸公公與里民吳炳集崑區南北二菑及水區民自鎮口開至葛家港共長二千五百九十二丈



深濶如舊又顧宗伯歲四舉同善會公偕朱節孝諸待  
詔助理傾篋無所靳其才其志足大有為乃年未衰遂  
無意于當世耶亦可感也已

周維璉

周維璉字仲肅曾祖書封興化知府祖大倫鴻臚丞父之  
甫松溪丞公幼嗜學孜孜勤勉患咯血遂棄儒業從海虞  
繆仲淳游繆精諳內經多著述盡得其傳切脈處方為人  
治病決生死每驗亦不擇貴賤薦授太醫院官先後令斯  
邑者如葉培恕鄧秉恒皆延為上賓無干瀆士林重之順  
治十三年督臣郎駐節于崑繪海上全圖其標兵頗為民

累適郎病延公治數劑而愈郎厚饋公堅卻請戢卒伍郎  
諾民賴以安年八十無疾終

論曰元人葛恒齋論醫當視時之盛衰為益損劉守貞  
張子和輩值金人強甚民悍氣剛故多用宣泄法及其  
既衰兵革之餘饑饉相仍民勞志困故張潔古李明之  
輩多加補益至宋之季年醫者大抵務守護元氣而已  
公以醫名桑海間或亦得此意乎顧公殫究蓮宗與張  
旅菴相策勵行己亦高潔不得僅目為良醫也

徐開遠

徐開遠字仲舒號赤松孺人父也先其世居崑自良始



良生浩浩生刑部主事申直言廷杖謫湖州判官不赴申  
生交河簿一元曾代常熟嚴文靖訥疏蠲江南糧數萬石  
一元生汝龍汝龍生太僕少卿應聘應聘生永芳永芳生  
公萬曆四十六年年十四補諸生能文章張孝敏稱為屈  
注黃河滾滾不窮旋與復社崇禎十二年領順天鄉薦乙  
酉城潰骨肉十餘口閉戶如平時有兵毀門入執公求金  
配張盡與所蓄未饜舉刃劈額血濺淋漓次子子固履恒  
怒詈為兵所斃長子民則履慎愈厲聲詈兵繫其髮于門  
環環射之又刃搯其頸死乃執公暨第三子子厚履愷至  
西城上愷大呼曰寧殺我勿傷吾父總戎有憐色將釋縛

傍有同知弗許縛益急忽大雨如注將吏兵卒俱避雨城  
下遂得間自城上投水關下愷沈而公浮脫走復遇游騎  
連發五矢中三又下三刃絕復甦往鄉療治亡恙時公之  
兄孟博開弘與其子存志履恂昭事履恪庸士履愷皆死  
順治十六年選授湖廣寶慶府推官時戶口流散瘡痍滿  
目公招來撫集請于旗帥嚴緝駐兵湖撫袁擴宇深器重  
之十八年以巡撫按伍事有連逮至京師事白得釋康熙元  
年補福建之汀州汀俗蠱毒盛行公嚴捕立斃丘士坤等  
數人杖下寧化山賊起屯踞汀邵延平間公請會廣東江  
西兵進勦親冒矢石獲其渠管踐禾等數十人而散厥部



黨民得蘇息又靖藩旗校橫噬人輒詣藩請正法二年分校易房得士多成令器三四兩年永定疊遭水旱米石至三金公謀諸郡守孟告糴江西飛挽萬石自春徂夏減價平糶四門施粥兼行賑濟民懽呼更生建公生祠于城西六年以勞瘁卒歸櫬之日哭聲載道孟羹瓦飯相望數里見者流涕愷愷皆諸生有聲慎講學勵行危城中猶作顧錢塘死事志愷十四歲時作孔子成春秋制執周武鎬京謂抵一篇春秋總論也

論曰公蒼顏鶴立聲若洪鐘書卷外無他好而居官廉敏仕與學相須若此哉晉江黃少宰起有作公祠碑記

云精明而行以寬大司刑而忘其官之為刑支鶴飲復述諸傳中蓋子惠斯民之實意固非俗吏所能彷彿也

### 周 鏊

周鏊字濟伯號桐灘祖之旦河南參政大禮子撫于大倫父維夔公善屬文萬曆四十六年補郡諸生旋授饒家貧教授生徒所得脩脯悉奉養父母為人端方厚重言笑不苟士林翕然宗焉順治五年充里選例廷試不赴偕族弟稽仲鋹隱左圖右史吟咏自適從游者益眾陳溪人慕公名具書幣聘往講學析蘿擢絲多先儒所未發陸鄉貢彥修曾賦詩褒之兩舉鄉飲大賓年八十三卒所著有周易



講義鉅暨其子念功藩玉粟間皆以孝稱

吳玄冲

吳玄冲字函白號鹿臣其先世太倉人父恭行業醫徙居崑山公自幼讀岐黃書治刀圭術已而奉父命習舉業補吳縣諸生試輒高等遠近右族爭延致為里塾師有故友顧姓子以官逋率其妻同受值于人公與支彙昭萬春廣為乞貸代償其值而官逋亦清乙酉夏避兵鄉居即買南郭一畝地縛茅編椳誦讀其中理先世舊業以三指活人順治十一年需次入貢提學御史檄之行堅辭不赴蓄名琴坐竹林深處揮絃竟日不倦工翰墨出入于北海會稽

晚年書大乘諸經雖視茫茫猶勉為之藏書法古畫偃曝瀟洒視勢利若將浼焉邑令召之醫不往遂絕跡塵市就醫者舟車填咽于籬落間也亦喜吟詩咏長春花云憑誰吹律暖風回着意東君次第裁已並畹蘭迎露茁還同籬菊犯霜開北堂聊代忘憂種南國疑鍾不老材莫笑仙家無長物碎金點點落蒼苔早春即事云園廬蕪盡竹橫斜个是今時中散家野客坐談新歲事鄰僧招飲舊秋茶酸風吹凍老梅骨亂雪裝成枯樹芽賸有昔年清興在瓦爐添火讀南華康熙三年寢疾子集壻張恕進藥卻之謂人云我年踰耳順不為天奚戀此人間世耶日以苦茗滌其



腸胃不食數日而卒聞者悲其志焉

論曰兩公行事不盡同而絕意仕進何其相類也當國家初造時廣闢賢路趨者若鶩即勝國諸臣亦多貶節乃兩公決然舍去甘老蓬樞夫豈易幾者歟或謂既無俗情盍于秦海之交謝去其諸生斯又求全之刻論矣

丘萬垓子鍾仁

丘萬垓字開遠長七尺潤面豐頤髭髯微短目光炯炯如世畫羽人劍客狀授經邑中務究聖賢立言之旨不沿襲口語學者信而悅之天啓元年補諸生崇禎十三年年未四十即謝去喜飲酒至斗不亂與之處浩浩落落稍涉齷

齷齪乎莫能干也家雖貧親隣偶乏絕有升斗必分給之遇歲祲人飢輒感額不樂稍穰則喜云民今樂矣每時雨至高峨韓魏公須臾慍滿三農望收拾神功寂若無之句詫人云此真宰相語士君子不可無此器量坐客皆驚公顏不忤以為常娶睢陽朱氏即節孝先生胞妹公服節孝之學命子鍾仁師事其舅鍾仁數踏省門不遇嘗踉蹌慮無以為公歡公顧謂云我僅以是期若耶曷不務遠者大者康熙六年病卧不食或問所苦答云我心無一事惟安靜以順天地之化而已九月初五日卒年七十二門人私謚尚志先生鍾仁字顯若又字近夫號一巖少即通諸經



大義能文章崇禎十一年補諸生順治五年鄉試幾售本房爭第一人不得而罷自此九躡場屋丁內艱哀毀骨立適楚聞尚志先生病馳歸不及慟哭幾不欲生作游楚抱痛記居兩喪皆遵古禮弗飲酒食肉既謝舉業惟開示來學孜孜罔倦為人和易而鯁直親知雖貴顯盡所欲言無忌諱康熙十四年方參議國棟蒞吳聞公賢延諸師席三年中無一私請方益敬重疾亟託其孤辰于公公護喪北行遂應博學宏詞之薦朱孝定口占贈別云幾行徵詔下雲衢更有長揚未獻無此去金門誰得似書成繁露舊醅儒老謝儒冠服草萊殘經重抱到燕臺只愁錯認文園病

特覲金莖賜露來十八年試罷授內閣中書舍人銜仍主方氏病甚明年南還六月初七日卒于河間舟次年六十著有孝經通解春秋遵經集說辨道錄

論曰丘氏世居長洲有畊讀先生者多隱操至尚志始遷崑身不沾一命而志常在民物足不出州里而其神常與造化者游一巖能繼之亦賢子也其門人甚眾有顯者遂得祀于鄉固當然而尚志尤不可及矣

王 惇

王惇字元直號遠齋奉議大夫堅志子也賦情恬退身自檢束不逐聲譽亦不藉世蔭年至壯始補太倉諸生為文



疏通弘遠試輒優異一時推為都講祭酒奉議卜居郡城  
以次子子雅偕自從而公與叔則微留侍母朱晨昏色養  
愉愉如也已而奉議視學三楚朱不樂遠行獨副室周挈  
其幼子子漸向明隨侍奉議沒公號慟奔赴扶櫬歸橐中  
幾無長物宗黨僉謂楚差最饒有卧而萬計之謠奉議即  
清介何至蕭蕭若此宜檢周裝毋令乾沒公揮涕云吾父  
以廉聞于朝寧有厚積若因而究詰不獨啟釁骨肉且挫  
吾父廉名我安忍哉議乃息公竭蹶營窀穸母沒哀毀如  
父喪既祔葬遂棄舉業專事古文詞間作小詩兵燹後流  
離播遷處無寧宇而參訂古今不異少壯時取焦竑獻徵

錄廣輯而編次之累數十帙又采古人格言懿行補小學  
所未備又編搜漢魏以來詩詞為韻編百卷惜皆散亡零  
落今存者僅所輯周禮義疏順治十二年卒年六十四弟  
微子枚吉存哲從子虞鵠存善並死乙酉難

論曰王氏家學以論世知人為大旨公胚胎前光大雅  
卓犖讀書得其根柢雖家日益貧溫飽疏食不悔不恥  
而楚遺一事堅卻浮言尤足見仁人孝子之用心迥越  
尋常也已

王 祭

王祭字偉長號詠易十歲喪父歛即能狀述先事累牘連



篇佩服母教鍵戶讀書經年不出鄰里亦罕見之初婚時  
母忽惡其婦婦無大故戒勿近公竟終身異室焉崇禎三  
年領鄉薦十六年授四川仁懷知縣值世變弗赴菽水盡  
歡有孺子色工行草踵門求者無虛日也亦能詩秋杪感  
懷云塵漬長纓不繫巾秋華零落夢中身黃衣恥說神仙  
事赤角空傷草莽臣萬井煙寒寧獨飽數傳茹檠敢言貧  
吁嗟憂樂誰先後何至艱難萃一人暑晝云造物本無意  
人間自寒暑悠悠日月馳東西互賓主祝融偶司節炎雲  
時散聚開冰吸鉛華苦熱如行旅亦有忘機人孤舟對涼  
雨初夏過吳介先園林云寂寂巖棲處雲開百尺樓棋聲

花下落人語竹林幽澁路殷紅聚芳塘小綠浮庶幾松柏  
隱何事稻粱謀曉發富春江云檣影風颭裏星釭釭尚半  
明雲霞迷海市天地一江聲烏鵲千年去琉璃萬頃平清  
宵不成夢倚柁聽商庚感懷云故園煙景有無間遠砌團  
紅定未刪破冢十年成綠字遺書半卷見青山斷芒久已  
辭朱履癯骨緣何比玉環此日平郊皆鳥道中原組繡自  
斑斑百尺龍鱗石脊橫長風獵獵眾山鳴披裘猶望朝曦  
暖得句懸知午夢清墜露三更同濁酒落英九畹即香秔  
夜來已見檐端月挂影參差半欲明乙酉元日云長河萬  
里曉冰融天上春來氣候同草木自憐摧折後衣冠遙附



崑山人物傳  
拜颺中何當劍戟成良耜盡使侯王獻大弓此日關山無限思洛陽粉荔自輕紅乙卯卒年六十八

論曰王氏相傳出自宋左朝請大夫葆明興遜復父子皆官御史復生湖廣石門訓導曰敏曰敏生贈編修銀銀生司業同祖同祖生刑部主事浩浩生德安知府炳璿炳璿生濟南同知在公在公生嶽蓋九世矣遜之鄉舉以洪武十七年為邑先輩甲子得雋者始其後正統九年四人弘治十七年十一人嘉靖四十三年一人至天啓四年凡五歷甲子而十七人之裔惟公補諸生與秋試一時嘖嘖歎羨歸美賢母張孝敏遂見諸吟咏乃

遭逢革命年將強仕竟甘隱遯又濟南勇退之家風也朱雪鴻云人可以不仕不可以不士旨哉

### 周家玉

周家玉字載璜號荆田又號龍三生時左額髮際有赤篆福字及就傳過目不忘大父麟陽玄昭愛之司教高郵攜之官署經史百家晨夕吟誦大母黃聞其書聲賚以金輒跪進母朱錙銖弗私天啓四年補太倉諸生崇禎二年麟陽盡瘁興安公以父望之輔疾代往奔喪奉柩歸賻恤無所受臺司交歎勞臣有後也六年中副榜九年領鄉薦時雋者率炫耀閭里漁獵成習公獨齏鹽自甘弗侈輿從



干官府也順治初李侍郎郭延齡王巡撫國寶統兵下江  
南開幕府得自行辟署偉公器度承制拜湖郡守公以捨  
攘之秋恐貽親憂堅辭獲免十三年喪母哀毀幾滅性十  
六年選儀真教諭訓迪人士曲成有法輒輿迎父首宿盤  
中盡洗腆之奉而父懷鄉返里未幾聞訃公痛不視含椎  
心泣血卧病者半載免喪後竟終身林下矣既得曾孫錄  
其先太僕復俊所賦同壽篇于扇頭云太僕之喜四世一  
堂也吾今亦然乎康熙六年十月微疾初九日索筆點易  
整襟端坐而逝年六十四

張乘

張乘原名元炳字漢章號聞大又號無聞五世祖汝舟仕  
至思南守生柳州知事毓秀毓秀生必顯必顯生世賢世  
賢生廷拭廷拭生三子公居末質敏力學鉤貫經史崇禎  
四年補諸生旋授齋與復社順治九年里選授石埭訓導  
能立師道成人材其故人莆田楊夢鯉令蓉城每歲公謁  
往來一再見抵掌談笑無私瀆也所著詩文詞皆樸茂旋  
里後日偕諸名流酬唱既歿子凌雲為甘泉令如子官

張雋

張雋字令光號宸芬八世祖璣以左春坊清紀郎遷荆府  
長史璣生昂昂生奎奎生獻獻生遼府良醫汝戡汝戡生



湖州衛經歷儀庭儀庭生扶畿扶畿四子公行第三自幼  
機警善讀書甫成童補太倉諸生試輒前茅坊間曾請其  
窗菽小題行世康熙九年里選廿四年授蒙城訓導念士  
習澆薄文風靡敝月課而旬校之廿六年旱蝗力糾士大  
夫捐貲賑粥蒙令偶出寄以簿書省差勸諭不苛擾也大  
僚將特薦公性恬淡不耐煩劇力辭<sup>三十</sup>廿一年卒所著有和  
尤太史侗論語詩三十章

論曰儒官之設董率諸生興賢育才非細故也彼黃髮  
皤皤垂頭丞簿尉間稱職有幾近更多捐貲以得之者  
矣湖三先生事慨然歎息不過三四十年已有今古之

殊乎孟子言人之患在好為人師願居此官者撫躬自  
問耳

葛 禹

葛禹字端調號蹇菴贈太常卿錫璫第四子也太常諸子  
多力學者而公與靖調萬齒埒尤相策勵夏月抵足卧徹  
夜論故事誤者罰駟蚊又戲倣師生禮取諸經注疏高座  
問難以為樂皆昆弟間之所希有曾題壁云人莫悲于心  
死而身死次之人心之靈雖夢寐必有所用用之以博聞  
強識則日生用之于利欲聲色則日耗耗者死之漸乎少  
而失學者必氣頹耄而知學者必志銳此巧之所不能飾



而拙之所不能掩也天啓六年補諸生崇禎三年領鄉薦  
嘗編次唐宋諸家文集錢虞山方慨越孫氏楚鍾氏之評  
隲滋多論議繁興得公本深加歎賞謂美而無譏論而不  
議猶有古之學者好學深思之遺意焉晚頗留心內典書  
法亦道勁康熙十八年卒年六十

論曰桑海後靖調高隱公迫上公車故違例罷歸不再  
赴斯其志詎異乃兄乎有河南王相國鐸者為諸生時  
貧無聊太常拔諸儔人中鐸感恩甚至其弟鑰令崑頗  
肯推相國誼公竟不往謁同年為直指造廬請見亦謝  
卻時論高之

### 顧錫璇

顧錫璇字徵泰先世居雍里贈少保惟誠恂始遷于城恂  
生封監察御史自如宜之宜之生浙江布政司都事孔修  
澡澡生蘄州同知贈太子太保舜祥夢羽夢羽生德安知  
縣懋孝允諧允諧生叔能天職天職生公而早喪母汪散  
遣童僕千指焚其文簿夜篝燈績輒課公膝前讀公亦能  
自發憤天啓六年補諸生授徒自給拮据營先人葬力植  
寡姊弱弟無德色重然諾嚴取與從祖兄尚書錫疇深器  
之有事必相訪多所采納桑海間避兵于鄉賊猝至公急  
奉先像擁諸懷賊睨為貨公舉示賊亦感動弗忍害也宗



伯既歿家法漸替公獨毅然負荷為族姓楷式舉鄉飲賓  
卒年七十三長子乃文存謨沈靜寡言笑稱長者

論曰公性剛毅眉竦竦有威每曳赤舄行道中目不轉  
瞬望而知為端人歿後二十年有王侁運者述其外祖  
張菊語云公過青浦守一遺囊俟覓者至而還之乃珠  
商商感泣拜謝公亦拜旁觀皆贊歎而公歸不以語人  
即妻孥莫之知也然則公生平之隱德詎少乎哉

張維芑

張維芑字同甫號誕嘉先世約之情與弟誠之意皆官臬  
副稱巨族情三子長里選茂實應文次茂仁應武茂良應

忠忠即烈愍父應文生鄉貢坤甫厚德厚德生公天啓六  
年補諸生崇禎八年改國子生家贍建普同塔掩骼埋胔  
又銳意問學與復社尤長吟咏春盡日云一樹花情一撫  
然豈知荷葉又田田忍開醉眼看歌扇 解回腸繫畫船  
金谷夢深紅葉雨石城愁重綠蕪煙不須更洒春風泪  
鶯聲似隔年從子專孟震亨曾梓常熟錢世揚古史談  
苑世揚宗伯也

王鍍

王鍍字維度原名璋字冲倫性抗慨大度多客游 遇  
晚依陸汝萊世鑰居乙酉之變汝萊亡命公遂破家歿後



子甫瞻刻其所著曰長鳴詩存今錄二章無題云紫霄漠漠信沈沈 鵠無端又入琴如意摩尼常在掌能言鸚武最關心瑣窗月上驚秋夢斷砌花飛動夜吟回首蓬山原咫尺仙踪自此渺難尋賦得桃源人去絳帷寒云桃源人去絳帷寒落盡千花及牡丹燕子故來尋舊壘鶯雛呼不到回闌甫瞻名如潛狂士忽緇忽素亦能詩好游曾訪巢縣楊士展于尖山阪寒醪薄糜高談達旦辛未八月在桐鄉病劇馮又三嗣京送歸崑越五日歿朱孝定相廬先徵君良齋為辦殮事明年三月朱聖木士櫨葬之

周楫

周楫字玄珠補嘉定諸生旋授餼既弃去改名鐸字漢仙雖從薙髮令衣冠仍襲舊制所居在吳淞之湄有軒三楹顏曰學圃脩篁叢桂蒼翠交映軒後隙地數弓雜植果蔬自給足跡未嘗入城市與金孝章俊民歸恒軒莊輩訂忘形交霜天雪夜一尊相對酒闌燭跋往往悲歌長嘯欷歔泣下晚年得養生術號澗濱漁隱又號巢梅野叟年踰七十卒所著詩多散失今錄二章農蓑春雨云小結孤蓬樹一叢滿田蛙鼓急催農蓑衣半挂桃花雨箬笠斜欹楊柳風茅舍竹籬村自遠樵歌牧唱道皆同閒來拄杖將何去懶向青山問別峯澣墅道中云舟行去來疾反覺青山忙



雲間忽東西松煙暗晨光山中老人高卧起常看風帆自  
來去舟中人盡識青山青山不識人何處

宋 汶

宋汶字子弗一字閔叔遭亂配楊殉節公傷耳竟不死好  
讀書能詩文吳及極稱其咏泥美人有生來南國初無種  
嫁與東風未有期之句尤工翰墨凡小楷篆隸狂草各臻  
其妙時歸昌世父子三四人皆善畫竹公後起蕭蕭數筆  
為歸氏所賞識焉

論曰韋布自歸呼鍾吳外豈乏詩家而其性情其行事  
不能若彼之著固有幸不幸焉然即此寥寥數語已足

傳矣有張定三辰者王於潛外孫也為人古愿意狀偃  
蹇少從嘉定侯豫瞻游得其風規以詩古文自許日惟  
攢眉吟誦不休遷吳門又遷槎溪老死無子遺稿不知  
處蓋著作之難必其傳也如此數公不猶幸乎

鄭伯昌子起濂

鄭伯昌字清文號纘若少游學補杭州諸生父之郊病疽  
為吮舐目不交睫者旬日母張疾瀕危夜叩北斗求代窮  
極調治病愈而兩目受患復察意伺動弗少離側母甚安  
適兩喪皆哀號擗踊三年未嘗見齒父有羨貲為葬費者  
貯于至戚既耗置不問粥田葬弟嗣昌後叔父之祁父產



仍均析嗣昌亦賢者不受交讓甚久終歸之乙酉之祁殉  
難嗣昌已先歿公經理喪事從妹方五歲撫如己出也春  
和里家廟兵燹傾廢其基為土豪侵占公竭力恢復庀材  
重購奉列主于中倣古宗法春秋合族會祭旁闢書館數  
楹顏曰還桂軒為子弟講習之所又忠肅興裔賜塋在餘  
杭嗣已絕樵牧蹂躪公親往瞻掃清復墓地神道碑碣整  
葺如故生平敦本務義類如此顧宗伯錫疇宋僉憲繼登  
張儀部采交相薦引堅不就有司將舉鄉飲賓感父未逮  
茲典亦固辭惟以醫學行世康熙四年卒年七十四子起  
濂字春陵號寄亭第五子也母徐夢大士授男生公七歲

值鼎革徐挈以避鄉公念父尚城居趨<sup>趣</sup>母復入牽衣涕泣  
偕父出免于難比長徐邁危疾公刺血書疏籲天請代兄  
起澄不善治生則供億周至歿任殯殮復時給資寡嫂無  
子按宗法置嗣且為授室季弟起源與其婦先後歿遺息  
瞻成無依則教撫者七年遺田五十餘畝每歲籍所入之  
贏為增置二十七畝授室時歸之馬鞍山楊貞烈祠合祀  
邑中節孝若而人公九世祖妣朱端卿及九世祖姑宜君  
居其二祠為大水所圯壞則捐費百金修治完好又忠肅  
祀維揚名宦歲久湮廢乃倡率族眾請于學使者檄行本  
邑有司重立木主賚送揚州學宮更請諸督撫建專祠本



邑齊禮坊南載在祀典康熙四十八年卒年七十一公于  
順治十三年曾補諸生文名藉甚賦冊呈誤遂紹醫學遠  
近交延然非專以醫重者也

論曰吾邑故族溯至宋時世數可稽惟開封鄭氏豈非  
以賢豪輩出如雙松介菴開陽者故能永久勿替哉續  
芣務本于家庭庸行而利濟邑中凡賑飢濟河諸事皆  
由此貫注以出寄亭繼志述事無幾微不類可謂世德  
矣抑聞續芣之訓云毋談人過毋交官長勿近狎友子  
孫能遵奉之繩繩正未艾耳

龔賢

龔賢字半千一字野遺居上元能詩百苦云百苦不一樂  
中宵夢忽清有家長作客到老尚謀生牆月背人下野風  
空自鳴明朝渡江水前路未休兵鄰竹為華處士賦云鄰  
竹連吾竹推窗眼欲迷細聽羣籟合下視萬根齊入夜防  
山鬼經春伏野雞清光既有分枕簟日須攜又曾梓中晚  
唐詩紀

何法

何法字方衡別號明農兵燹後僑居松陵家貧門多長者  
所著有記素草菰蘆吟大都消碣礪磨壯心長歌當泣也  
擬古云荆山有美玉剖為圭與璋君子以為佩明德生輝



光謀身悔不早辛苦徒悲傷誰復念飢寒卒歲無衣裳戚  
戚摧中心世事安所望山行曰欲入匡廬社深山獨自行  
挂瓢尋澗水倚杖聽松聲一望梅花屋能無丘壑情何時  
堪卜築高卧樂躬耕春興云草閣無人問閒庭花自開三  
春過又半雙燕獨歸來交道貧中見雄心病裏摧王孫搖  
落日空使婦人哀同及山夫過徐虞部西園今為戒幢禪  
院云化城古木俯寒流策杖還同賦客游幾處殘碑荒草  
沒一層畫閣晚雲收爭看白社多高會誰為烏衣起舊愁  
見說疏鐘鳴夜月猶疑歌舞擘瑩侯憶故園莫舉傷春日  
聞歌喚奈何夢因啼鳥破愁為落花多風雨嗟人事烟波

憶釣蓑故園空在望歸計日蹉跎

周如凱

周如凱字元暘號知希戊申己酉間與四方名流賡和于  
嘉定之東岡陳確菴瑚序之公詩凡八首同人集朱岸先  
齋即事云相將一棹過翦燭聚同人風景孤山夜文章大  
出春雉壇今雨訂蓮社舊情真瀟洒渾忘倦銜盃欲向晨  
江天聞雁云風急雲開萬里天月明旅雁過秋潭聲哀似  
訴情千縷影落疑傳信一函愁裏忽驚寒塞北客中況復  
老江南無端入耳腸猶斷知有離人夜不堪秋梧云一葉  
驚秋天下知霜欺風翦雨淒淒故園賸有高枝在月照空



寒待鳳棲秋園晚晴云池館蕭疏萬木寒雨收徐步夕陽  
殘煙開薜荔顏如洗秋老梧桐色未乾山簡風流還足樂  
陶潛日涉自成歡天光不為幽人吝楓葉明霞一片丹秋  
感云年來踪跡任浮萍蒲柳秋深望又零未及種花彭澤  
徑漫勞問字子雲亭客愁每向閒中劇心事偏從醉裏醒  
回首故園何處是玉峰天外白雲停聽雨云積雨空庭外  
浪浪響徹宵隴頭遲納稼湖上遠生潮彭澤憐花老巴山  
憶客遙無衣木榻冷相送夢魂飄落葉云萬木霜凋不自  
持小窗飄墮影相隨庭中月色連雲下夜半秋聲帶雨吹  
片片動人晚景恨蕭蕭添客故園悲御溝一任留題句老

我心灰不寄思挽朱法五云將謂青山共暮年訃音忽報  
泪潛潛相期蠟屐隨成夢猶記拈詩有賸篇阻我雨風寒  
食路思君煙柳斷腸天何能再得孤窗夜話到知心對燭  
憐

浦 鷗

浦鷗字浪臣號隱農僑居黃歇渡躬耕食力以詩歌自娛  
而好義頗負奇氣當湖陸侍御沒公書輓詩一軸負之經  
吳淞江汲第六泉一壺匍匐問渡達泖口入門懸軸出水  
斟甌中拜哭云公在嘉定止飲民間一勺水故以為獻眾  
皆太息聚觀然公與侍御初未嘗相識也吳淞江上有樊



崑山人物傳  
將軍廟鄉人奉為土穀神呂夔配食薄俗謂夔有淫行每  
竊刮面粉製媚藥公一夕乘醉毀夔像投江中所著有勞  
安堂詩梅花云寒勒枝頭開較遲珠攢玉綴覺參差禁霜  
禁雪明孤潔和月和煙寫逸姿花盛何郎重到日格高逋  
老久吟詩年年獨倚成愁絕瘦影相看有所思花巷云石  
橋東去稍紆行夾岸花枝錦簇成迤邐此中斜趁蝶婆娑  
其下仰聽鶯香粘雙屐偏宜雨光射孤筇最喜晴容我每  
春游十日仙源咫尺記分明冷泉亭云孤亭靈鷲下泉脈  
出幽岑源冷無冬夏流長自古今試嘗真沁齒纒坐便清  
心卻憶香山老寒光映我襟

論曰四先生久寓他邑使不自言故籍孰知為崑山人  
者春秋傳謂樂操土風不忘舊也援古証今惓惓父母  
之邦固君子人歟而一聯半句又各有流傳半千最著  
黃進士九煙朱翰林竹垞皆嘗推許浦作雖稍遜事跡  
較詳或因人以存詩或因詩以存人均足千古焉



先王父文敏公獨賞集序云昔歐公嘗言生平心喜梅  
聖俞詩及舉梅集中最得意者以問聖俞聖俞輒不謂  
然予甚疑之以為知聖俞者莫如歐公何兩人之見若  
是其不同歟既而又思古人為詩本以宣其心之所欲  
言而一時有所難明往往纏綿反覆比物託類隱躍其  
辭任人各以其意求之而淺深隨其自取故春秋之時  
列國諸侯大夫聘享賦詩雖極不相類者可以斷章取  
義如鄭伯適晉賦將仲子享趙孟賦野有蔓草六卿餞  
韓宣子或賦褰裳或賦風雨或賦籜兮或賦有女同車  
皆世所稱淫佚之辭而叔向趙武韓起之徒羣然善之



豈非人心至靈不域一境當其感觸忽焉相通作者之意不妨在彼而讀者之意又不妨在此歟吾于是知歐公之與聖俞兩人當日之心亦必悠然各有所觸者其不同無足怪也予少好詩見人單詞片句欣賞不置乞歸無事因取二十年間名公鉅卿及騷人墨客言之可誦者彙為一編凡若干人詩若干首各附數語識于其前一褒一貶出以己意斷斷如也嗟乎予本江東腐儒謬因文學廁身侍從然而迂僻寡合踽踽涼涼每當盈庭廣坐千百人之前踟躕四顧不能一語故其所采之詩孤幽峭遠多有與予之心相感觸者誠以獨賞在是

不求曹<sup>曹</sup>好焉耳予固不敢自比于歐公亦未暇計世之為聖俞者信其言然否也昔康熙五年三月三日禧按集邑有七人入選而文敏自題首十四絕句言及邑人者僅云葵園冥蹈是吾師標致天然冠一時更愛城南歸處士風流幾首落花詩海虞馮叟筆通神比興詩篇字字新若較吳均真敵手邢夫人見尹夫人木客山顛嘯月華水仙泉底弄珠霞夜深自寫鍾君句寸寸枯苗<sup>戰</sup>戰鬼花破扉煙斷出孤吟廡下高風尚可尋萬首雷同誰敢擬懸軒簫鼓一聲琴豈尤所屬意耶今列五先生傳為卷附以獨賞集所選詩雖諸先生晚年傑作有先



崑山人物傳  
文敏所未及見者竟不敢混入焉

呼谷

呼谷字德下號葵園高祖高陽雲為惟大之孫幹之子好飲早世曾祖君寵承惠甫八歲隨母改適于崑山曹氏冒其姓稍長勤勞貿易起家祖似山明道謹愿為黠者所中家遂落父恒素元縉幾不能具飭粥矣公少時名簡在刻勵好學夏夜讀書則納足瓮中避蚊蚋顧宗伯每獎許之崇禎三年縣錄冠軍院試復首補諸生乙酉遭世故謝去復姓更名并其弟簡臣簡輔簡祐改曰原岡淵作呼氏譜傳又念惟上二世僅知有窰基寺丞而名字失稽寺丞上

無聞焉欲徧訪同姓異其一合癸卯渡江由邳往汴登華山至西安道汾晉間入燕從齊魯歸泰岱闕里皆周覽惟于咸寧三趙村得諸生含初始祖為呼十逮其從父謚以單呼無考綴延領萬曆丁酉鄉薦公語云劉向列仙傳酈道元水經注皆載呼子先升仙事宋史徽宗與金人通和議將軍呼慶奉使不辱何謂無考含初欣然願去延從呼也公有行紀亦附譜中蓋惓惓先世者如此丙子八月二十日卒獨賞集選公詩凡八首讀秦本紀云秦皇貪方熾四海欲未窮云亭封禪後遠憶蓬萊東童男采靈藥入島去何從不見沙丘道鮑臭雜尸虫驪山生時沼已知仙去



功星漢閉泉壤江河移幽宮怨積高于天一丘安足崇雨  
中梅花云開亦不及晨落亦不及晨開落會有數所負歲  
寒心經霜已百日積霧又彌旬春光且勿問猶願太陽親  
徘徊久觀望辭柯下依根餘香委照地故往聊復存安能  
更蹉跎又待來年春曉春曲云鸚武呼人夢未起東風初  
度紅樓裏窗前梅萼綠三分雪意凝膚凍欲死此情灰盡  
卻還生撥動青青纔寸指草香不到真孃墓祭掃清明看  
誰過上林花早宮漏遲間關百舌五更時一春正好一朝  
暝柳暗催黃鶯未知東家有女學春梳髮薄如煙二八初  
折花照鏡無人見低擲青銅拋路衢鄧尉光福梅作花游

人蕩漾白日斜妾乘肩輿郎乘馬寒風獵獵吹塵沙橫塘  
十里不相見歸去城中各生怨太平游樂兵火餘吳王舊  
宮拾金釧吳兒薄俗羞貧賤家無擔石錦衣粲上元燈火  
破十千家家門前星斗亂排場白晝圍萬人麥短踏破游  
車輪野外東風正料峭揮汗如雨生紅塵園林初夏云園  
林日向好首夏最相關物物迎耒長時時遶徑刪引藤初  
上樹放竹欲侵山無奈孤花減一聲啼鳥還籬門傍水住  
春去斷蒲荷溪谷南風變琴書靜日過全家依笋蕨幽夢  
積藤蘿漸惜紅塵客清陰奈若何

論曰君寵以故仕族買書金陵藏諸家四傳始得公桑



海間躊躇于儒冠之去就夜分不寐入白母葉葉云科  
第富貴命也汝行所志而已遂決計高隱錢虞山見公  
南燭詩歎為殊絕多方延致卒不肯一見而胸中浩浩  
落落不設町畦雖田夫孺子終日相對無忤色焉又研  
求性命徧參知識受牧雲門公付囑乃葵園一集大都  
悲天憫人感時悼俗之詞何歟暮年尤注意銷圩龍仙  
柏廬交相勸止謂處巢許地毋庸代禹稷憂也

歸莊

歸莊字爾禮一字玄恭號恒軒父文休先生昌世以酒豪  
里中公與兩兄皆善飲小飲輒數石公少通五<sup>經</sup>諸體書

以氣自豪酒酣興發引筆疾書落紙數千言不能止崇禎  
五年補諸生十年應提學御史試酒瓶累累筆硯間日未  
晡完七義分正草隸篆書五經文字御史忤而斥之有  
為忤言此狂士實高才生復之且令應鄉闈試報罷手其  
場中文持盃擊節謂世無伯樂吾何尤焉乙酉六月北兵  
下蘇州邑令楊永言解印綬去丞閻茂才迎降即以為令  
十二日下令薙髮士民不從譟于縣治明日起鄉兵聚教  
場結盟者二三千人公告于眾曰今日之事先斬丞乃可  
率眾將入署會太學生陸世鑰起陳墓者已遣兵縛丞在  
舟中矣公謂不殺丞人心不堅語陳墓兵當先以丞首徇



于城乃與汝遂牽登岸時鄉兵皆持槍棍惟公帶刀瞋目奮劈拔刀欲下有屠者張壽云公不慣此事授我丞跳入水壽急揮刀斷其首水中以刀復命公遂贈之七月城陷新令至究前事公危急亡命捕得壽詰為首者壽曰我殺閻丞死則死耳何多引人為固不言公遂謝儒冠往來湖山間遠近之談忠義者必以公為歸然公固揆是非辨真妄未嘗輕以身殉卒免于難一日訛傳公連湖州莊氏案捕逮甚急公不知也襆被至洞庭山訪其壻金侃于翁澍氏澍方設席聞公至坐客皆散去侃驚遽出迎止之門問其所從以公動止如故延入告之公云酒來他何足問其

浩然自得多類此初隱居沙家村村在新洋江東去城市遠不得酒發故麓沈酣于諸子百家殆舖其糟而醞其醞故詩歌古文無不工已而廬太僕墓側結繩為門糊紙作壁榜曰萬家基用韓淮陰故事也每自謂狂草近代無敵以酒至者長箋短幅雜然並進揮洒至日昃不倦販夫傭隸皆得之獨不喜應貴介請其徒或規撫形似竊名字以酬應公亦不問焉南渡錢塘北涉江淮必奉祖先像行遇令節生辰則采藻束芻以祭晚年不能自給寄食僧舍顧非素交雖厚贈弗納既中酒病肺不休忽夢故友招入社自知不起癸丑八月廿一日卒年六十一獨賞集選公詩



六章并節錄叙語云落花之咏昔稱二宋自明以來詩人  
唱和動數十篇然諸公皆處順境推激風雅鼓吹休明雖  
遇衰殘之景多作穠麗之辭即有感歎不過風塵之況顛  
顛之色而已我生不辰遭值多故客非荆土常動華實蔽  
野之思身在江南仍有大樹飄零之感以至風木痛絕花  
萼悲深堦下芝蘭亦無遺種一片初飛有時濺泪千林如  
掃無限傷懷是以摹寫風情刻畫容態前人詣極嗣響為  
難至于情感所寄亦非諸公所有也江南春老歎紅稀樹  
底殘英高下飛燕蹴鶯銜何太急溷多茵少竟安歸闌干  
曉露芳條冷池館斜陽綠蔭肥靜掩蓬門獨惆悵從他江

草自菲菲花到春殘不自持無知豈解怨天時臨流易逐  
千層浪繞樹難隨百丈絲色染斫池文士惜影過妝鏡美  
人悲名園那便容蕭瑟翦綵無如此日宜融和天氣轉淒  
涼冉冉紛紛舞欲狂難向幕中依燕壘慣來橋畔罨魚梁  
水紅疑出茱萸月白空臨薜荔牆醉罷賞筵猶未遠到  
今還把送行觴庭中野外亂飛翻哀怨無窮總不言帶雨  
墮堦苔濺淚隨風貼水荇招魂玉簫盡出新篁館畫舫多  
依綠樹村時過不辭就消歇尚餘芳氣在乾坤枝上黃鶯  
漸露身飛英歷亂墮紅塵將隨薜荔依山鬼難共靡蕪待  
美人河北名園貪結子武陵歸棹欲迷津香車寶馬緣都



盡天賜幽人一錦茵開時參錯落偏齊紅入池塘香入泥  
長薄煙疏蝴蝶散空枝日瘦杜鵑啼吳宮漢苑春何在洛  
水巫雲路已迷最恨東皇收拾盡不留一樹綴山溪

論曰公好奇忽請于學使者改名祚明自後或稱歸藏  
或稱歸乎來其字或稱元功或稱懸弓或稱園公既薙  
髮僧裝稱普明頭陀亦稱鑿鑿鉅山人生平最善顧亭  
林以博雅獨行相推許而不諧于俗遂有歸痴顧恠之  
目矣公念太僕集多亥豕失傳請錢虞山訂正更謀登  
梓與汪堯峰往復辨論不少下將竣而疾劇囑兒子玠  
善成之夫豈狂生不事事者哉有友序公集云玄恭胸

中甚不得已假詩文以發之昔司馬遷謂屈平離騷之  
作蓋自怨生怨者忠孝之至非懟怒憤激者比故曰小  
雅怨誹而不怒離騷畧得其遺嗟乎士生今日莫不以  
忌諱為嫌即知怨為忠孝所發而卒不敢怨乃玄恭坦  
然言之此玄恭之所以為狂也玠字安蜀能文有守篤  
誠自信終里選

吳 爰

吳爰又名喬字修齡原籍太倉州來贅崑山崇禎十一年  
補諸生尋斥遂事佛兼好神仙入京師與鄔陵梁侍御曰  
緝劇談世外徹夜不倦忽聞江淮間有異人裹糧策蹇往



從之比歸受雪峰俊公付囑而詰辨玄要幾似三峯之于  
天童也聚數金輒試爐火術不成不悔康熙三十四年七  
月廿一日卒獨賞集稱公于書無所不窺大則天文樂律  
地理兵法小則醫藥卜筮壬奇禽乙刺鎗拳棍靡不精心  
叩擊探原竟委歷歷能道其故自少迄老不為人知故其  
為詩淒涼悲憤如水鳴峽如鐘出谷如寡婦之晨號如羈  
雌之夜叫聽者魂搖色顫腸裂心摧嗚咽涕洟莫能自止  
洵詞家之絕調騷人之極則也凡選二十三首楊柳枝云  
紅為桃杏白江梅各得三春笑一回慎勿將身作楊柳苦  
隨羌笛勸離杯越蜀燕吳萬里長人生何處免離傷須教

截斷舟車路南北東西任綠楊舟須絲纜馬須鞭折盡楊  
枝減綠煙若使枝空離別少不辭憔悴在尊前賦贈長沙  
李寶孃云微聞薌澤更留髧列坐環流白墮春燭影烘明  
千瓦雪歌聲驚落一梁塵笑談此夕歡須假漂泊他鄉苦  
是真紅袖青衫相搵淚風情無分共傷神柳絮云桃不傷  
心杏不憐枉教零落百花前輕揚泛水猶寒雨散漫過牆  
欲暮天飄盡楚臺空似雪飛來梁苑未成綿春風得似春  
愁遠便送秦淮向洛川馳馬美人云一道清光百眼攢輕  
塵遙裏出雲端如何元亮閒情少不願將身化馬鞍聞驢  
鳴有作云新秋深夜動遙聞急管哀思未入雲武子几前



曾笑我韓山石外每逢君塵終浩浩皆愁老草正萋萋獨  
離羣知道孫陽不入耳灞橋風雪倍殷勤燈花云已為灰  
燼意難平更向人前笑一莖桃失春蹊何灼灼桂非秋圃  
孰英英脂浮初夜根無託地落深更子不成慟汝行藏全  
似我雨窗雪壁倍傷情獨梅云琢冰積雪一生心繆遣微  
香鐵石侵寂歷都忘惟對影蕭疏自喜不堪林暖憑蜂蝶  
趨桃李冷與巖流共古今摧折年年憔悴極半枝猶壓萬  
花沈遠山云不煩著屐可馳神窗外青青入座新半折定  
容仙萬歲一尖應有路千尋曾看屏畫牽離思為似眉痕  
憶故人海上劍芒秋正割欲飛難化百愁身霜云秋風無

處不橫斜卻有清霜動物華奕奕西林驚榭葉蒼蒼南浦  
歎蒹葭好隨庾亮三更月莫向潘檀一縣花我與同人盡  
去口似君雙鬢漸參差蠟梅云翠羽無聲月向低幽姿獨  
畫樓西孤山薄倖何多事又向春前納小妻蜂云名園  
幽砌每逡巡居卜香畦置蜨鄰利劍行空猶俠客細腰成  
病似詩人羣開牙仗常尊主徧宿花房不染塵甘苦入脾  
皆自覺肯將口腹怨陽春畫眉烏云傳枝撲草翅鱗鱗入  
得朱門更泥人密幄三陸千摺錦䟽籠六面百條銀聽成  
象管堪填拍看比韓娥只換身最是五更殘夢裏每聆清  
響便沾巾寒夜云霜逼孤檣夜氣深一燈清熖百年心酒



消北雍回文錦香散南唐卍字金羈轡幾人能作健江潭  
何處可行吟鄱陽聞有長年藥欲刺扁舟破浪尋初春登  
西城晚眺云江梅寂寂杏悠悠野望行吟一散愁山色晚  
來看似水春光雨過怯于秋老知雜學非高韻貧歎清言  
似拙謀五合濁醪三折杖登城情緒似登樓和人花王詩  
云君王春色自年年斧辰常當穀雨天油幕合宮朝尚早  
錦茵宣室席猶前曾稱芍藥矜臣貴為悼瓊花失后賢蜂  
進新黃蝶獻粉小朝廷事亦紛然馬嵬云不愁拋髻上驪  
山吹破伊涼到一丸遙望天頭纔劍閣回看馬尾即長安  
釵橫髻亂君恩絕海立雲垂仙路難解語花殘雞樹老沈

沈西苑漏聲寒潘妃云笑啼難處卻堪憐不待相看膝上  
絃敢歎綠珠痴得絕輕將國豔擲樓前歌風臺云蕭蕭睢  
泗水生波游子歸來意若何豈把新威矜父老不將故里  
易山河斷虵自得生龍采烹狗誰能脫雉羅成敗英雄同  
一恨騅馳虞泣亦高歌題士女灌蘭圖云已屈高姿玉砌  
旁莫羞小女惠壺漿秋霖不下人間久誰惜君為王者香  
讀韓致堯別集云翠翹金雀綴珠鈿曾近雙扉聽四絃醉  
裏不能忘驪裊夢中猶得見翩翻子規失國終稱帝黃鶴  
無家亦是仙莫訝西崑歎雛鳳浣花標格更誰傳秋夜云  
豈是為秋哀秋將與冬來痴兒孺是網嬌女褚成苔蛩楚



不催夢燈明遙落煤空堂風雨夜心髮一時灰又善古文  
辭魯用天子禮樂論云遠古之事倍于禮而難信者折之  
以經而傳之離合可斷也何謂倍禮之事周公未嘗改玉  
而祭以天子于禮安乎天子禮樂而成王賜之元公受之  
事可信乎使成王闇主元公佞臣則將惟寵之榮而不顧  
名器壞法亂紀之事容或有之明君賢臣其與也必臣之  
可受于我也其受也必我之可受于君也與之當受之安  
布之天下傳之子孫可以辨等威定民志不可與而與不  
可受而受鄉黨之間簞食豆羹之小猶或譏之況于朝廷  
之尊禮樂之大乎成王令主必不以名器假人元公純臣

必不以僭逆自累天子禮樂魯為宗國有司肄習以備王  
朝之闕失子孫掩而有之用于朝廷而託先王先公以自  
文也故曰揆之以人而事可斷也何謂倍禮之言賜天子  
禮樂見于載記多有傳誤若聖經則必信而無疑者也魯  
頌乃臣子溢美之詞牧馬獻俘細事猶載焉有天子禮樂  
成王賜之元公受之非常盛典而不張大其詞播于聲詩  
者乎惟事跡闇汶故託之前人而不能詳也春秋重物始  
凡變古之事託始以書桓公五年書大雩則知魯始僭雩  
也閔公二年書禘於莊公則知魯始僭禘也僖公三十一  
年書四卜郊則知魯始僭郊也郊禘僭於後世而宮懸八



侑始於伯禽理不然矣春秋之所詳如此詩之所略如彼  
成王元公之厚誣不已白乎故曰折之於經而傳可斷也  
田單論曰伊尹周公之所以為聖人者以其安集前烈而  
奉之沖主也臣之于君而猶父之于子是以為古今之所  
貴三代以後獨推諸葛以具體乎伊周耳湯武昭烈肇建  
大業伊周諸葛實成之而得乎聖賢之譽有臣于此開國  
以奉其君而終身執節不謂聖賢之徒而沒之列國功名  
之士可乎當樂毅破齊七十城皆燕有破騎劫復故土非  
他人皆田單力也斯時也南面而據齊以親以功以德皆  
合乎大義何也沙陀非李氏之種以賜姓滅賊而天下後

世許其繼統晉元唐明皆非嫡子為能復先烈定禍亂而  
宗族臣庶共推為君田單親則託體先王功則再造社稷  
德則安全士民闔陽城而王利就而名附求其倫比光武  
之盛也計不出此棧道木閣迎法章于陽城之山而立以  
為王此其居心伊周諸葛何以異乎且也伊周諸葛顧命  
老臣恩禮深厚單則諸田之疏賤而已守先王之遺業而  
致之嗣王與復已失之土地而授之逃主親承顧命之元  
老與事急推死之疏宗輕重尤不可以概論也又觀其在  
朝呼相單則徒跣叩首其不以元勳自處而盛部曲據權  
勢又可知矣論者不察謂之名將發幽德之潛光豈無待



于後世乎張承業輔翼晉王破汴復仇不得立唐之子孫  
竟哭以死是安平望存勗者也身雖閹寺不愧田葛之風  
焉宰相論云人君享有神器宮政不可無后國政不可無  
相唐自張良娣之後宮政落于內侍定策國老門生天子  
而唐以亂亡明懲汪胡之專嚴革宰相使學士擬旨而與  
五府六部比肩事君苟且二百餘年至于末世兵革繁興  
兵部增兵而不計國用之乏戶部加餉而不顧民力之窮  
閣臣守位而不能甄進賢才遠計得失從兵部則增兵從  
戶部則加餉民窮則盜起盜起而賦增則民愈窮民愈窮  
而盜愈熾竭蹶奔趨至于亡國覆宗深可痛也夫閣臣擬

旨但能彌綸上意而不能與六部通融六部奉旨但能下  
行諸省而不能幹旋勿穆雖三楊劉戴猶無轟然之功況  
于周楊輩乎有天下者宰相之設與廢不可不詳論也夷  
考古今三代尚矣秦之相權最重自生殺自專黜陟惟意六  
卿為之曹郎御史大夫為之佐貳司直為之舉刺于內刺  
史為之舉刺于外而漢仍之以致莽之亂故光武不任三  
公操懿而後凡為相者皆逆節也此無他以宰相教令得  
自行于百官而不由帝主耳唐太宗用魏徵之言別立制  
度宰相雖尊壓百僚而不得自出教令每事上聞門下受  
上旨而行之此雖有似于明獨其進賢才料兵食皆能自



由故姚宋贊皇之論得以建功立事宋之宰相雖撤坐位  
設參政然猶統攝六部事權歸一故相業亦有可觀明初  
專任汪胡有似西漢失之太重其後廢宰相而以學士擬  
旨有似東漢六朝失之太輕比于唐制不逮遠矣賢才有  
賢才之志節賢才相朋無以逮唐宋諸臣之功名奸雄有  
奸雄之卷舒奸雄相朋亦不能為曹馬蕭楊之篡奪自好  
者囁嚅俯仰僅免詬厲不肖者通苞苴媚奄寺外受臺諫  
之誅咏內供帝王之頤氣而已夫御今法古貴得其平相  
有篡天下之權而可以治天下者西漢是也相無篡天下  
之權而不足以治天下者明是也相無篡天下之權而可

以治天下者唐宋是也三者宜何從焉

論曰朱雪鴻嘗稱公**模**糊**忘**機一任氣自遂古民世目  
為有心計人非也顧公論詩最嚴譏斥弘嘉以來有辭  
無意者不遺餘力每謂無好句詩不動人而好句寔非  
至極處唐人妙在不着議論聲色含蓄深遠今惟馮定  
遠誰能之其詩有云禾黍離離天闕高空城寂莫見回  
潮當時最憶姚斯道曾對江山咏六朝金陵北平事盡  
在其中又云隔岸吹昏日沸天羽書惟道欲投鞭八公  
山色還蒼翠虛對圍棋憶謝玄馬阮四鎮事盡在其中  
又云席卷中原氣大麤小朝終見作降俘不為宰相真



間事留得丹青夜宴圖以韓熙載寓刺馬相也又云王  
氣紛紜三百年也由人事也由天石頭形勢分明在不  
遇英雄自枉然以孫仲謀寓亡國之戚也唐人後未見  
無好句之佳作如此者尤推定遠古今樂府論考據精  
詳蓋作家真賞政不顧世眼耳

鍾曉

鍾曉字淳崖又字人雅面短眉目秀聲若洪鐘貧窶甚無  
妻子不設爨具飢則就人索食兼索酒不擇美惡時時大  
醉夜歸橫門以卧亦無帳被如是累年曾闖入縣治唐突  
令令答之每一下輒呼好或聞其事異而問焉答云言好

與言痛同一出聲耳朱雪鴻謹曾示公和陶詩數十章未  
入覽遽謂云子之胆天大陶可和歟誦再四則大呼云陶  
也陶也中摘四句云此則非陶雪鴻歎服公後竟以沈飲  
溺死獨賞集稱公詩別具深情妙緒如怨如慕如泣如訴  
當其絕至哀樂紛來能使人當歌忽泣亦能使人破涕為  
笑古稱尤物善移人情斯之謂歟凡選二十五首黃金云  
南北路歧壯士止黃金無言竟如此秋堂嘯雨吟古槐鷄  
衣索莫誰家子世人作事無殊調相逢惟有適然笑入眼  
當憐崔烈兒論心莫妬蘇秦嫂金裝寶帶意氣新一時迎  
送何續紛出門入門難重陳白眼青眼本一人余今吳門



辭員薪攬衣遠躡山中春矯士殉名先草草空將心力事  
風塵南城夜詠云麗譙岑嶙肅嚴鼓虛城月景飄空素此  
夕吟魂正黯然隨風直躋長天路與子成言復成約今秋  
病骨癯如削一夜夸猶君不來乾旋河轉昏星落春閨云  
雲底夢重重青春莫負儂花前一雙淚樓外兩三峯風草  
迢迢意煙波去去踪擘箋憎恨字窺鏡惱愁容笑靨經年  
斂顰痕盡日濃碧闌承午望紅袖倚春慵燭短珊瑚泣窗  
虛雲母封簾開低小舳屏罅度奔蜂妝閣綠金蘚琴牀落  
瓦松不堪銀浦水歲歲種芙蓉無題云海外難尋藥江南  
易採蓮真真新畫裏小小舊湖邊月始初三夜花當第一

年東雲分片雨抱影得微煙藹頰全開靨拋髮半覆肩飄  
來應是夢飛去便為仙霧薄籠香淺風多落絮旋隔簾春  
罨畫臨鏡月聯翩注眼疑裁水停身欲上天花情忘巧笑  
柳意愜幽眠軟語喃喃慧清歌的的圓避人書字小背客  
寫蘭偏平倩居愁下凝眸在泪先碧闌慵態委紅印睡痕  
鮮有事偏宜喜無聊更可憐托腮眉隱約兀首思連綿草  
縷終難殺荷絲不易牽綠塵看野馬青漢望風鷲天上原  
無恨人間悔有緣陳王徒自苦空賦洛神篇短歌云宿莽  
薄神州英雄未白頭筆伸千載屈劍取十年讎海上原無  
帝杯中別有侯自非詞賦手俠客舊同游對酒云且莫論



斯世還當盡此杯送春花作客迎夜月為媒便逐殘愁去  
旋招好句回百年共塵土何惜玉山顏臨戎云雲色忽然  
顏英雄面似灰旗紛連燒火鼓動半天雷搏戰全軍鬪衝  
圍萬馬摧書生毋謾語共爾進金壘萬騎正猖狂窮兵蹙  
一方砲頭開血路日景亂刀光雲黑城全破川紅陣已亡  
人生非好死容易說沙場邊角振遙空傷心是武功燐明  
連夜雨腥動滿城風骨化龍沙外形歸麟閣中何須歎走  
狗始去哭英雄情來云梁家新畫閣漢苑舊金房不盡鉛  
華水千年流恨長荒城春泯泯古渡月茫茫誰復能遣此  
情來實可傷一身云萬卷千竿奉一身雲饒水濶豈為貧

無端杯酒尋常醉有幾籬花次第春魚腹好容獨醒客松  
毛穩卧不言人長沮舊宅今誰主舉世滔滔那問津海云  
八月秋空天地驚東滄雲黑晚潮生勢浮窮髮三千國聲  
沸吹脣十萬兵藥使迢迢何日返桑田渺渺幾時耕尾閭  
未滿終無底一望溟濛動不平宦宦東南無際天秦時男  
女漢時船已疑徐福非方士復訝孫恩是水仙運石謾勞  
隨弱羽駟山須待借長鞭何人汗漫乘風去花發鶯啼不  
記年一章云唐叟員瓢索賀囊經年詩債未全償且傾滿  
滿杯中月試遣蕭蕭鏡裏霜蕉葉枯禪參衲子桃花深恨  
謝漁郎不須更泥傷心地獨自臨風咏一章寂寥云龍梭



夜靜綠窗中十載行雲夢不通秦女有情難化石楚臣無  
泪不成楓三春病怯廉纖雨一夜魂移蕩漾風無限寂寥  
收拾盡斜陽深樹是江東索居云東風薄薄水淙淙恨字  
三千泪一雙蘭自有心居楚畹竹非無意住湘江愁中春  
色何須惜病裏詩魔不必降更與何人道憔悴殘花飛入  
讀書窗望仙吟云碧山碧海絕風塵玉洞深藏出世人青  
鳥擬傳塵外信彩霞疑是夢中身千年木石勞炎女八月  
星河誤使臣逝水飛花人去盡不知何處是通津無事云  
無事休投阿母桃馬卿空為世人勞擬從巴叟尋靈藥悔  
向漁郎借小舸葵性有方終自轉藕腸無緒正難縑眠花

夢月渾閒事潘鬢春風見二毛洞簫云一聲吹動紫煙痕  
蘭氣初流滿座温二女有情將鳳子諸儂無眼識龍孫陰  
陰夜月閨中夢娟娟春風水上魂愁絕參差毋作語有人  
和泪過吳門甄皇后云銅鏡銷鸞罷畫眉斷腸離鳳怨將  
離拋拋紅泪辭春緩側側青髮就組遲豈悔有情憐魏植  
獨悲無命殉袁熙千年洛水千年恨塘上哀吟更泥誰鐵  
釭云不經百鍊不精神惜此頑然一鈍身何日良材逢毒  
手幾時生面脫囂塵既無把柄休施技莫有鋒鋸便殺人  
短缺蕭蕭龍影逝可堪將汝過延津紫竹云紫竹簾攏青  
漆扉前宵猶得見依稀杜鵑自恨身非帝孔雀應憐扇是



衣柳性亦宜風宕宕花情不愛雨霏霏分明領取人間恨  
江北江南各自歸曾因云曾因採藥伴劉晨一斷音容便  
隔塵翡翠繡囊香尚在鴛鴦硃印字猶新當時蕭史非愁  
客今日相如是病身欲擘苔牋書百紙亂分離恨贈行人  
雲髮云鬆鬆雲髮綠拋肩赧面迎人最可憐樹是相思休  
借種柳因離別不成眠心凝鏡影依稀滿泪滾珠光大小  
員認取湘娥舊眉黛洞庭湖上有輕煙門外云秋草春風  
無限情醉時長自放歌行不須更入空山去門外真堪慟  
一聲

論曰公食鮮一飽行吟不輟見巖牆壘粉輒以所作題

擘窠書識者謂風神絕俗似初日芙蓉也其咏泥美人  
有君如歸國甘為山郎若封關願作丸之句傳播人口  
幾幾乎婦孺盡知獨長律之微元白及温李體者則盛  
侍御借刻漁洋世竟莫識為公作矣然精華錄已汰去  
鉅公忍讓寒士之美哉

梁逸

梁逸字逸民號春隱少白山人辰魚曾孫嘗徙居吳縣紅  
葉村時同邑張定三辰亦移家閭門外而湖州濮澹軒淙  
新安汪長魚子蛟皆游寓四人以詩相友有游山唱和詩  
一卷既歸崑刻其生平所著詩稿仍以紅葉村名志所樂



也老無子每謂我詩存字內即我子孫矣間為篆刻尚古  
樸薄工巧年八十六卒獨賞集稱公古詩神味淵涵冲乎  
自遠凡選三首春閨怨云珠簾溼曉露斜月炤曲房含愁  
不成寐起坐臨彷徨瑣窗花影動對鏡嗟流光時俗競綺  
羅稍稍矜新妝春風自多情妾意自多傷獨抱瑩侯立鶯  
聲宛轉長別人云春風一相見神動斗酒間微吟落山雲  
何忍遽言還花飛不成夢蝴蝶相與閒君歸拜高堂調笑  
俱歡顏別離在斯須咫尺如河山何時賦歸來松菊掩重  
關達人雖耿介旅食誠難攀芳時思無窮悠悠聽潺湲書  
懷云開戶見南山山南美人住繞屋長松聲俄作半山雨

所思期不來且辭美人去日莫春雲飛幽懷滿芳緒

論曰及彤寶丹生作公傳于文敏沒後猶稱其自韜晦

不肯折節具刺輕詣人與熱客相徵逐以余所見稍和

易豈貧老使然耶至公五言古詩何蕭閒散遠亭亭絕

塵也吳修齡云余幼學為唐體詩謂古詩如虞夏衣冠

不適于用年過五十見五言七言亦然律離古詩氣脈即不

能佳少陵勝人處實在于此因詳讀古詩知以兩漢十

九首建安陳王阮公為極致已後偶句日多漸失自然

鮑謝固佳視陳既有間矣齊梁聲病既立沈宋撰為四

聯之律詩又東以沈韻不得叶用惟少陵近體詩于東




以下原缺待有  
別本鈔補

縛中能不失古詩變動出沒之意如丈夫之足雖有行  
滕不廢騰踏餘則潘淑蓮花極



得中能不失古詩變動出沒之意如古文之足雖有行  
跡不容驕踏餘則潘淑蓮花極









MAY  
A 1